

東
華
續
錄

東華續錄

同治四十三

臣王先謙敬編

臣張式恭恭校

二月己巳欽奉 慈禧皇太后 懿旨翰林院檢討

徐桐著在弘德殿行走授皇帝讀○予浙江殉難知州譚祖勳祭葬世職○庚午諭議政王軍機大臣等張之萬奏賊匪被擊南趨擾至西平縣境派兵追剿並遵旨暫行回省布置各摺片賊匪由洧川東竄尉氏經僧格林沁督軍擊敗遂由臨潁郛城一帶循熟南趨擾至西平沿河奔竄髮捻合而爲一人數眾多乘隙鋌走若不合楚豫皖三省之力聚而殲旃勢將此剿彼竄流毒無所底止著張之萬飭令張曜宋慶等軍視賊所向探蹤疾追急擊勿失僧格林沁駐軍鄆陵整飭馬步著卽拊循激勵以作士氣一面催提

詹啟綸黃秉忠兩軍迅速到豫俟兵力厚集由該大臣酌量調遣
務當穩慎進攻謀定後戰盡殄逆氛官文前有合兵會剿及派成
大吉江長貴周有全等分軍扼守要隘之奏此時賊蹤漸近楚疆
成大吉一軍前已令赴豫省卽著官文飭令該提督等偵探賊蹤
迎頭截擊其從前派定守兵並著調令出境攔剿以收兩面夾擊
之效儻賊蹤日趨日近卽著官文畱省居守吳昌壽出省督兵以
期呼應靈逆不至貽誤軍事潁亳一帶爲捻匪故巢尤須嚴防回
竄仍著喬松年督飭英翰等軍嚴密防守並酌撥勁兵會合楚豫
官軍三面兜剿毋得稍有疏虞汝甯伏莽未清此時賊蹤逼近汝
郡深恐勾結蔓延益難收拾毛昶熙務督飭兵團認真堵截不得
縱賊南行致干咎戾張之萬見已回省著將省防布置妥協仍偵
探賊蹤出省督兵剿賊以保巖疆派防荊子關之姜玉順一軍前

已有旨飭令赴豫歸僧格林沁調遣見雖賊勢南趨而商雒一帶防守仍不可稍涉空虛著劉蓉督飭在防各營嚴密扼守不得因賊氛稍遠遂形懈弛本日據御史賈鐸奏苗匪伏誅後餘匪竄入六安等處夥黨並聞麻埠鎮有地主教教首江智芒等均係霍山縣人勾通苗黨趙傳經等作會聚眾蓋有地主宮傳教入會者已數千人請飭查拏等語苗黨趙傳經等以漏刃餘生膽敢糾眾釀亂怙惡不悛見在出沒六霍一帶若不及早剪除深恐餘燼復熾著喬松年迅卽派兵馳赴六安州麻埠鎮等處按照該御史所指各匪犯嚴密查拏兇剿淨盡並將地主宮拆毀以絕根株該處偏近光固一帶儻匪徒被擊西竄難保不闖入豫疆見在捻眾駸駸南趨尤慮與固始匪徒勾合致剿辦又形棘手著張之萬嚴飭光固等處防兵並各該地方文武各官認真緝捕有犯必獲以靖餘

學賈鐸原片著鈔給喬松年張之萬閱看將此由六百里各諭令知之○辛未諭議政王軍機大臣等明誼麟興車林敦多布奏續調蒙兵赴古截畱餉銀並前調蒙兵擅自回旗及勸捐羊隻各摺片前因新疆回氛甚熾關外別無可調之兵諭令明誼等調派喀爾喀蒙兵援剿乃疊據廣鳳等奏稱前項援兵接仗失利旋即潰散折回科城是蒙兵之紀律毫無緩急難恃已可概見且據明誼等奏稱該部落壯丁無多不敷調撥亦係實情若令勉強湊派充數徒糜餉項於軍事有何裨益明誼等見擬續調兵五百名並飭前調之東西部落兵一併聽候調遣著明誼麟興車林敦多布卽將前項蒙兵概行撤令回旗責令防守各該游牧邊界不必再行徵調免致有名無實土謝圖汗部落扎薩克達爾瑪僧格車臣汗部落扎薩克車林敦多布管帶蒙兵由烏里雅蘇台起程前赴古

城援期輒敢藉詞逗畱遷延不進實屬咎有應得均著交理藩院嚴加議處古城情形危急色普詩新前已督帶木壘河戶民赴援著保恆飛咨前進聯絡聲勢內外夾擊以期力解城圍伊犁等城需餉甚殷據明誼等奏已將二起解到之餉銀入萬兩內撥赴伊犁銀五萬兩截畱銀三萬兩擬爲調撥蒙兵之用見在蒙兵旣無庸調撥所有前項餉銀著探明古城巴里坤一帶如有路可通卽行設法解往俾資接濟蒙古生計維艱旣停止徵調明誼等所請勸捐羊隻卽著毋庸辦理以示體恤其聯捷所帶黑龍江兵五百名前諭明緒飛咨該大臣斟酌情形或卽令徑達伊犁助剿惟古城亦危在旦夕此項官兵出關西進若令前赴古城程途較近仍著明緒酌量緩急情形妥籌調遣將此由六百里各諭令知之

○壬申諭議政王軍機大臣等李鴻章奏派兵由海道赴閩請飭

福建廣東各督撫協力籌濟各摺片劉銘傳周盛波等軍前諭李鴻章飭令赴閩援剿茲據奏稱該軍二十四營見紮皖豫交界之三河尖離蘇已千餘里往返徵調必誤師期豫省捻蹤飄忽靡常仍應暫留該軍駐淮河上海以資扼堵該撫見派郭松林統帶楚勇七營楊鼎勳統帶淮勇六營益以曹仁美黃中元各營並由上海雇備輪船赴閩助剿所籌尙屬妥協著該撫卽行飛飭丁日昌趕將輪船雇備催令該軍等迅速起程並將軍裝口糧妥爲籌備以利師行見在侍逆大股久踞漳州窺伺泉廈郭松林等所統均係洋槍隊攻堅破敵所向有功該軍由滬航海至廈登岸相機進剿甚爲便捷著左宗棠於此軍抵閩後妥爲調遣飭令會剿漳州踞逆迅殲巨憝力拔堅城廣東官軍前已越境克復永定縣城並著毛鴻賓郭嵩燾懷遵前旨飭令方耀等軍乘勝進攻漳州與江

蘇閩浙各軍協力進取其王德榜黃少春等分剿汀漳之賊見在情形若何著左宗棠妥爲部勒隨時馳奏蘇省餉需入不敷出李鴻章見擬將郭松林等援閩之軍照蘇省各營餉章暫行勻撥於上海廈門兩處設局解運具見畛域不分以後惟當源源接濟以資飽騰蘇軍向係按照各營人數另給食米柴薪油燭等項俾臨敵不至缺乏惟郭松林等軍抵蘇後去蘇日遠勢難瑣屑代謀著左宗棠徐宗幹卽行派委委員籌款就近採辦隨營轉運以期無誤軍情賊勢靡定郭松林等進剿之軍將來若去廈門日遠蘇省亦難兼顧並著左宗棠徐宗幹毛鴻賓郭嵩燾就近協力籌濟毋使停兵待餉致誤軍機閩省籌餉較蘇省尤爲竭蹶李鴻章仍當於無可設法中竭力籌解顧全大局方爲妥善劉銘傳等軍見紮三河尖本歸曾國藩調遣見在豫省賊勢南趨皖省邊防甚關緊

要該軍等既已毋庸赴閩仍著曾國藩妥爲調度飭令扼要嚴防如賊氛竄近皖疆並就近由喬松年斟酌情形或令出境截剿與僧格林沁追兵夾擊毋得畫疆自守任賊紛竄將此由六百里各諭令知之○諭劉蓉奏追剿竄回獲勝餘逆回竄甘省會攻階州踞逆獲勝請派大員總統三路官軍並請雷馬隊防陝各摺片逆回竄往醴泉後經彭基品等分道進攻毀平賊壘餘匪晝夜狂奔由淳化縣境返竄甘界長武縣屬另有甯州竄匪滋擾雷正綰派周顯承等軍由肅鎮一帶追至白吉原該逆復由南原繞竄安化地方渡河意圖盤踞白吉原復肆鴟張雷正綰見已親督六營回紮涇州分扼北原党原等鎮以顧邠長門戶著卽飭各營認真扼剿以遏後股竄匪並飛檄雷恆余萬明等馳赴長武段登雲等馳赴三水之土橋分路迎截扼剿並著劉蓉迅飭彭基品等軍由乾

州進趨邠州以杜該逆合併之謀刻下同逆雖已返奔甘境仍虞不時回竄雷正綰劉蓉當嚴檄各軍合力防剿務將白吉原匪股悉數聚殲毋任勾結蔓延爲患蔡逆盤踞階州憑險死拒經蕭慶高等連日設法猛攻直逼城根勢已窮蹙深恐鋌而走險復竄陝疆見在川陝援軍齊集城下亟須大員總統進剿以期迅拔堅城四川提督胡中和已由廣元起程赴階計日可到所有蕭慶高周達武所部援師暨甘省會剿各軍均著歸胡中和節制調遣以後剿辦情形卽由該提督專摺隨時奏報以一事權如有何路官軍不遵調度致誤戎機並著該提督隨時查明從嚴參辦林之望一軍屢經諭知恩麟飭該臬司率所部赴階助剿並著胡中和飛機林之望迅卽馳赴階州督率張華等軍會合湘果各營扼紮兩水各隘節節進攻迅殲醜類胡中和總統三路援兵責無旁貸當能

協和將弁共奏膚功以副委任一切督軍防剿事宜仍著駱秉章
悉心妥籌與胡中和會商辦理固原回逆孫義寶見因官軍偪攻
擬令回眾盡殺家小乘馬紛竄蓄謀甚屬兇狡非有得力馬隊萬
難追截陶茂林所募王守基馬隊一起雖經劉蓉截留備用爲數
究屬無多侍衛訥依楞阿由揚州帶領馬隊一起赴甘從陝省經
過著照劉蓉所請暫准截留陝省調遣以備緩急仍著與都興阿
籌商如甯夏軍營亟須此項馬隊而陝省邊防較鬆不至逆蹤闌
入仍卽飭赴都興阿軍營助剿均由該署督等熟商辦理如孫義
寶等騎賊紛擾或致蔓入陝邊並著都興阿雷正綰隨時酌撥勁
旅兼籌防剿以遏奔突劉蓉另片奏請留已革藩司辦理捐輸等
語已革陝西布政使毛震壽著准其暫留四川辦理捐輸事宜協
濟陝餉一俟經手事竣仍飭卽赴滇省將此由六百里諭知都興

阿雷正緒略兼章劉蓉並傳諭胡中和知之○予甘肅陣亡參將
劉厚俊傷亡參將李德高陝西陣亡副將朱之南等祭葬世職○
癸酉諭內閣前因蔣益澧奏賑減浙江嘉興府屬浮收錢糧一摺
當經諭令戶部議奏茲據該部奏稱浙省甯波紹興等府浮收錢
糧均於上年經左宗棠奏明覈減嘉興府屬各州縣歷年浮收地
漕等項銀兩實與甯紹各屬事同一律自應一體裁革以昭公溥
各等語加恩卽照所請嘉興縣著減去錢四萬二千七百二十八
千秀水縣著減去錢三萬五千五百六十四千嘉善縣著減去錢
五萬七千四百七十八千海鹽縣著減去錢一萬九千四百一十
四千平湖縣著減去錢三萬九千七百七十九千石門縣著減去
錢二萬九千三百四十九千桐鄉縣著減去錢三萬一千三百二
十六千統計各屬共減去浮收錢二十五萬五千六百三十八千

卽著永爲定章其從前以錢收納者悉令統照銀數收納不准再有大戶小戶之分儻地方官吏陽奉陰違仍或添設名目格外需索及大戶不遵定章完納者卽行查參懲辦並著該撫將各府屬平餘一項破除情面再行認真覈減酌定數目詳細開造清冊報部以憑查覈○添設湖南鄉試同考官二員○甲戌諭議政王軍機大臣等都興阿穆圖善奏甯夏軍務萬緊穆圖善一軍未能分兵出關據實直陳一摺前因新疆烏魯木齊等處疊就淪陷伊犁等城岌岌可危是以屢諭穆圖善統兵出關先抵哈密節節掃蕩茲據都興阿等奏稱甯夏之賊環城築壘抵死抗拒都興阿等督飭各營分投雕剿尙不能迅速蕆事若將穆圖善一軍抽撤兵力更形單弱須俟楊岳斌抵任甘省鎮撫有人都興阿等卽可出關剿賊等語所籌自係實在情形惟新疆賊氛日熾古城迤西處處

蹂躪已至不可收拾而甘省賊眾兵單不敷勦辦若強令穆圖善出關則都興阿兵勢愈孤顧此失彼目前情形大爲支絀楊岳斌同籍募勇爲日已久約計此時已部署起程楊岳斌受國厚恩畀以兼圻重任自當迅速就道慰朝廷西顧之憂且該督所請各省協餉及酌提釐金等款業經允其所請是兵餉兩端均可無虞掣肘若再藉詞遷延非但有負委任且無以慰甘省軍民之望著楊岳斌迅帶新募勇丁剋期先行赴甘其未經募足之勇卽責成彭楚漢楊明海等趕緊招練成軍陸續西發不准稍事稽遲致滋延誤都興阿穆圖善等務當就見有兵力激勵拊循迅圖規復甯靈肅清北路俟楊岳斌行抵甘省後卽可整隊出關大張撻伐哈密防守緊要都興阿等已派署肅州鎮總兵德祥帶兵千名前往哈密著卽催令德祥迅速起行前赴哈密扼要駐守以資策應西甯

地方緊要前據都興阿奏請飭令鶴齡前往鎮撫此次請將鶴齡改赴哈密之處著該將軍等斟酌情形或另選得力武職大員帶兵前往西甯以資鎮攝卽可替出鶴齡統帶所部出關與德祥台兵一處藉壯聲威將此由六百里各諭令知之○乙亥諭議政王軍機大臣等官文奏髮捻敗竄豫省楚境已就肅清請將帶兵各員開復處分出力陣亡各員准予分別獎卹並官文吳昌壽奏剿辦長陽縣滋事匪徒各摺片髮捻各匪竄擾楚境官文以欽差大臣出省督剿屢經嚴諭務將股匪就地殲除不准旁竄他省官文覆奏時亦曾以此自任乃紙上空談竟無實際在事文武僅欲以驅逐出境了事以致竄楚之賊長驅入豫見賊蹤已及西平難保不再行回竄該大臣何得因楚省肅清遂謂已竟全功鋪張其詞爲將士乞恩保獎殊不料官文身受殊榮猶有畛域之見如此亦

何怪諸臣之相率效尤耶所有上年剿匪尤爲出力各員暨陣亡員弁著官文先行存記俟此股髮捻匪眾悉數殲除再由官文奏請分別獎卹湖北長陽縣刁民田士信卽田思羣畏罪聚眾滋事在四方臺等處負隅不出經官文吳昌壽督飭都司曹立全等於巴山楓子嶺等處帶兵剿捕槍斃匪眾數十名該大臣等復添派提督譚仁芳四營馳赴漁洋關會合知府唐協和等由長陽長樂兩面兜剿卽著官文吳昌壽檄飭帶兵各員將該匪等剿除淨盡毋畱餘孽並著惲世臨仍遵前旨嚴飭水陸各營並鄰近各州縣一體認真防範毋令闖入境內致滋延蔓將此由五百里各諭令知之○撥神機營官馬四百匹赴山海關備操防○予故湖北布政使劉體重入國史館循吏傳○丙子諭內閣前因御史賈鐸奏參湖南巡撫惲世臨等貪劣各款諭令胡家玉等前往查辦嗣據

查惲世臨違例濫委毛鴻賓辦理乖謬各情當經降旨將惲世臨等交部分別嚴議議處茲據吏部奏稱惲世臨於勞銘勳未開巡檢之缺遽委代理知縣實屬違例濫委於例應回避之胡崧兩次委署縣缺又在鹽釐兩局解銀加補火耗銀兩任用同鄉張崑祁密查州縣劣蹟致滋物議該撫並在常德府任內任意加抽鹽釐迫升任藩司始行稟請立案尤爲有心掩飾毛鴻賓於勞銘勳胡崧二案毫無覺察並於請咨引見之道員胡鏞輒令檄回原咨委辦稅務委署道缺辦理實屬乖謬請將惲世臨照不應重律加等議以降四級調用毛鴻賓比照督撫將降調離省人員委署別缺例議以降一級調用均係私罪不准抵銷各等語湖南巡撫惲世臨著照部議降四級調用前任湖南巡撫升任兩廣總督毛鴻賓著照部議降一級調用均不准其抵銷湖南試用知縣胡崧例應

同避胞兄輒敢匿不呈報蒙混得缺實屬取巧並著照部議降二

級調用不准抵銷○毛鴻賓降調以吳棠署兩廣總督彭玉麟署

漕運總督

由兵部左侍郎署

○惲世臨降調以李瀚章爲湖南巡撫李福

泰爲廣東布政使調張兆棟爲廣東按察使以趙長齡爲四川按

察使

前廣東按察使

○丁丑諭議政王軍機大臣等早保遵旨覆查操演

西丹團練兵丁及續行訊出常明等與巴克喜夥開店當等鋪見

辦情形一摺吉林操演西丹團練兵丁既據早保查明尙無扶同

隱飾各情卽著無庸置議至巴克喜與常明明祿夥開店當據晉

隆當義誠店執事人供明實係合股夥開立有合同查驗該鋪原

帳合同均各相符常明等亦各供認不諱足見凡事盡一分心力

卽有一分效驗早保從前於此等緊要關鍵並不悉心研鞠若非

嚴旨查詢卽已蒙混了事外省積習大都如是實堪痛恨見據常

明等供各願將所入貲本與巴克喜填補虧項巴克喜在庫閱十二年所有庫帳庫收等件顛倒錯亂多有不全非徹底清查不能得其確數該署將軍見督同委員等調齊庫司卷冊按年逐款詳細確查著卽督飭認真查覆不准再有絲毫含混常明明祿依克唐阿家產並著先行查封備抵並責令分賠足數以重帑項常明明祿與巴克喜至戚分掌銀庫戶司關防依克唐阿係巴克喜胞弟在銀庫行走其爲盤踞要津把持利藪毫無疑義所供委無通同舞弊侵虧庫項等語均難憑信仍著阜保悉心研訊務須水落石出以成信讞菸酒雜稅及一切應查各件仍當逐一詳查妥議章程具奏盜匪痞子李等並著嚴飭派出兵弁一體嚴拏毋稍懈怠忽將此諭令知之○戊寅諭議政王軍機大臣等本日議政王軍機大臣將林鴻年咨文並昭通臨安官紳稟詞呈覽滇省全境糜

爛僅有昭通東川臨安三府尙未淪陷可爲進兵之路見在護理
昭通鎮總兵楊盛宗固守地方疏通道路且與岑毓英馬如龍等
均無所忤自可責令秣馬厲兵相機進剿至臨安官紳堅不附回
爲國家保此疆土其誠惻甚屬可嘉惟近因馬如龍率眾數萬圍
攻江川雖經恩榮梁士美等援救獲勝而賊眾兵單餉需告竭岌
岌可危著林鴻年迅速籌措銀數萬兩源源接濟以維該處紳民
向義之心馬如龍既稱歸誠向化何以於林鴻年處從未見稟且
舍杜汶秀不討而日與臨安士民爲仇其居心殊不可問可見梁
士美等呈內所稱負隅省城暗行其逆等語實非過激之詞林鴻
年與勞崇光等務當隨時訪察妥籌辦理不可稍涉輕信墮其術
中滇省變亂已久非大兵雲集不能戡定而籌餉徵兵尤須借助
四川等省之力見在黔西大定等郡先後淪陷遵義府勢亦甚危

黃白號匪又竄近川南之永甯川東之綦江等境蜀軍分防要隘更有何力分撥赴滇是欲平滇逆必須先平黔匪勞崇光張亮基身任封圻於地方軍務一味粉飾毫無措置以致賊勢蔓延全省幾無完土實堪痛恨若不再振刷精神力圖補救自問當得何罪勞崇光見駐黔省著卽會同張亮基遴派兵勇將黔西大定等城迅圖克復並將黃白號匪次第掃蕩不得再有稽延駱秉章督飭川東各軍越境會剿務將黔邊巨寇合力殲除張凱嵩卽飭楊廷桂一軍馳赴古州會合黔師認真剿辦李瀚章已簡授湖南巡撫著卽馳赴新任督飭援黔之周洪印等軍迅速進兵夾擊李瀚章未到任以前仍由懌世臨檄飭前進毋失事機該督撫等務當同心協力將貴州各匪剋期殄滅庶可騰出兵力專意進剿滇匪底定邊隅林鴻年亦當相機前進迅赴昭通等處督率楊盛宗等防

勦兼施不得藉待兵待餉爲詞稍事延誤其滇省懸需兵餉仍著
駱秉章極力籌畫源源解濟該督素顧大局想自能不分畛域隨
事圖維俾免掣肘將此由六百里各諭令知之○己卯諭議政王
軍機大臣等駱秉章奏官軍疊攻階州踞逆續獲勝仗胡中和赴
階察看軍情並請飭陝省安設驛站各摺所奏攻勦兩水等處賊
壘屢獲勝仗與劉蓉前次奏報情形大略相同該逆屢次大挫其
膽已寒亟應痛加勦洗以竟成功前據劉蓉奏稱四川提督胡中
和在川省日久諳悉戎機由廣元赴階計日可到當經諭令胡中
和節制川陝各軍督勦階州踞匪以後勦匪情形由該提督專摺
奏報卽著胡中和仍遵前旨督飭周達武蕭慶高等妥籌進勦迅
拔堅城並飛檄林之望赴階州督飭張華等軍嚴扼兩水要隘毋
任旁竄一切防勦機宜仍當與駱秉章劉蓉隨時咨商妥辦胡中

和赴階州後敘南所畱七營亦須另擇妥員暫行統帶鶴齡一軍
已由略陽前進卽著駱秉章飭令鶴齡迅赴哈密毋稍延緩該督
所請先調鶴齡會剿階州踞匪之處著毋庸議駱秉章奏請飭陝
省照舊安設驛站以速郵傳等語前因陝西驛路梗阻改由川東
遞送湖北河南以免阻滯見在漢南一律肅清自應仍由陝省接
遞著劉蓉查照舊章飭令各該州縣照常安設驛站凡遇川省文
報仍由山川北各州縣遞至陝西山西直隸等省往返接遞以免稽
延將此由六百里諭知駱秉章劉蓉並傳諭胡中和知之○諭惠
慶奏古城危急調兵救援一摺逆回攻撲古城暗挖地道轟擊經
惠慶督率官兵奮力守禦斃賊數百名危城得保無恙所辦甚好
仍著激勵兵民同心固守以待援兵前據扎克當阿奏已咨令色
普詩新統帶木壘河戶民赴古救援此項民眾旣激於義憤志切

同仇自必能用命前驅色普詩新本日業經降旨補授吐魯番領隊大臣著卽統帶兵勇由奇台一帶節節進剿力解古城之圍毋稍延誤內地援兵業經疊次調撥惟程途遙遠到尙需時此時惠慶色普詩新惟當聯絡聲勢穩慎圖維力保完善不得稍涉大意致墮逆回奸計需用餉銀卽著派員赴烏科兩城將解到之餉設法迎提以資接濟巴里坤爲古城東路屏蔽著惠慶等咨照伊勒屯何瑄慎固封守督率旗綠各營擇要扼紮以爲色普詩新後路聲援所有此次古城守城出力員弁著惠慶擇尤酌保以示鼓勵將此由六百里各諭令知之○予故署烏魯木齊都統哈密辦事大臣保恆祭葬卹蔭如副都統例○予古城陣亡協領巴哈布祭葬世職○庚辰諭議政王軍機大臣等沈葆楨奏請賞假歸省一摺沈葆楨因復接家書知伊母病勢加劇望子之心日切請給三

箇月馳歸省視情詞悵惻出於至誠沈葆楨著賞假三箇月回籍
省親以遂孝思江西巡撫關防卽著交孫長紱暫行護理惟福建
寇氛仍熾被擾地方多與江境毗連左宗棠督兵在閩自可次第
得手該匪不能得志於閩恐將回竄江境是江西本省之防萬分
喫緊沈葆楨必須妥爲布置以期萬全無失方可啟行此係朝廷
曲體該撫之心不得已而俯如所請如果馳回省視厥疾暫瘳著
不必俟假滿以後卽行馳回江省視事以重地方所請假滿陞見
一節俟福建軍務平定再行具奏候旨遵行求忠臣者必於孝子
之門該撫當念朝廷爲地擇人倚畀至重不可稍存諉卸用副厚
望將此諭令知之○允吏部議嗣後保送御史有犯貪污劣蹟者
將原保堂官照保送京察不實例議處著爲令○允沈葆楨乞假
歸省命孫長紱護理江西巡撫

由布政使護理

○辛巳諭議政王軍機大

臣等英桂徐宗幹奏飭禁洋人通賊並辦理泉州等處防務一摺
前因毛鴻賓奏侍逆李侍賢有勾串洋人之謀諭令英桂等查拏
茲復據英桂等奏訪聞洋人惹隔孫有與漳逆串通貿易情事訊
據惹隔孫供稱被英人蒲浪誘騙到漳曾與侍逆會飲並無接濟
軍火而蒲浪又控稱係惹隔孫令伊到漳作爲通事供詞詭詐互
相狡賴著英桂等札行該國領事官務將實情訊出嚴行懲辦侍
逆李侍賢被剿窮蹙計無復之必將勾串洋人希圖竄逸朝廷早
經慮及故疊次諄諭該將軍督撫嚴密查訪此時賊勢如困獸在
檻尤宜加意防範著英桂左宗棠徐宗幹一面多派弁兵梭緝訪
拏一面行知各該國領事官講明信義令其一體查禁至泉州地
方會匪伏莽尙多同安安溪等縣聯界之處僻境紛歧難保無匪
徒導引繞襲官軍後路著英桂等嚴飭派出之道員張啟煊知府

程榮春會同泉郡文武將守禦事宜悉心籌辦派撥兵勇於邊境各要隘密拏奸匪以杜勾結左宗棠抵閩後剿辦情形久未據該督奏報實深厯繫卽著該督將近日軍情賊勢並如何籌辦進取之處詳細馳奏將此由六百里各諭令知之○諭前因惠慶奏古城危急請調巴里坤官兵赴援當經諭令色普詩新統帶兵勇卽由奇台一帶會合木壘河戶民前進力解古城之圍茲據色普詩新所奏各情與前旨適相脗合惟據稱巴里坤旗綠兩營除前撥赴援二百餘名外存城兵丁無多防堵城隘尙不敷派撥見飛咨都興阿統帶大兵前來以作後援等語都興阿見在圍攻甯夏急切未能出關而巴里坤防堵關繫亦爲緊要無兵可撥自係實情該大臣已自坤起程赴古統帶滿漢官兵相機進剿想於道經奇台時其戶勇二千餘眾自己均歸統帶前進著卽懷遵本年二月

十三日諭旨激勵此項民眾會合官兵節節進剿以解古城之圍
惠慶惟當慎固城防並與色普詩新聯絡夾擊痛殄逆氛其巴里
坤領隊大臣印務既交協領伊勒屯署理所有一切防堵各隘機
宜卽著色普詩新咨照伊勒屯何琯認真嚴密扼要布置毋稍疏
虞色普詩新統帶援兵其所需餉銀前已有旨諭令派員赴烏科
二城將解到之餉設法迎提以資接濟並著都興阿恩麟迅卽籌
款協撥以濟兵食毋令缺乏將此由六百里諭知都興阿惠慶色
普詩新並傳諭恩麟知之○廣直隸南宮安徽阜陽縣學額各二
名○壬午以瑞麟暫署兩廣總督由廣州將軍署石贊清暫護湖南巡撫
由布政使護理○予廣西殉難知縣茅本蕙訓導譚立勳等祭葬世職○
癸未諭議政王軍機大臣等雷正綰奏官軍攻克固原州城及疊
破蕭河城一帶逆巢請將已革臬司張集馨畱甘商辦善後並糧

運匱乏請飭陝省妥籌接濟各摺片固原地勢險阻城池高深陝
逆孫義寶等乘虛竄陷負隅久踞經雷正綰督率各軍奮力攻克
寶屬謀勇俱備調度有方克副委任見在固城雖破而逸出賊匪
馬隊尙有數千孫逆是否被戮尙無確據深恐漏網餘生復行勾
結煽惑死灰復燃著雷正綰實力追捕務絕根株以清餘孽甘回
張保龍等既知執梃助陣保護漢民卽著雷正綰宣布朝廷威德
將降眾拊循綏輯責令將馬匹軍械等件全行收繳其蕭河城降
回並著分別良莠酌覈情形妥籌安置不得苟安目前草率了事
致貽後日之患此時固原已下雷正綰等軍應由何路進剿並著
都興阿穆圖善雷正綰妥爲籌畫相度緩急何處賊勢最重卽由
何處進兵迅殄醜類同膺懋賞此後進剿機宜卽著雷正綰將地
勢險要並賊匪巢穴詳晰繪圖呈覽已革臬司張集馨著准其畱

於甘省由雷正綰督令將撫綏善後各事宜認真辦理稍贖前愆
不得粉飾敷衍有名無實甘省地瘠民貧向不產糧慶陽糧臺不
惟協餉未充即使有力採買亦屬轉運維艱見在雷正綰一軍已
克堅城勢成破竹若令停兵待餉必致貽誤事機著劉蓉督飭藩
司林壽圖將雷正綰軍營糧食寬爲籌備並由林壽圖督辦糧運
事務遴委幹員在陝境設立轉運局嚴督沿途州縣源源飛輓毋
許藉詞推諉致誤要需雷正綰另片奏請將成瑞免罪施鵬暫緩
遣戍各等語已革提督成瑞從前辦理撤回案件獲咎甚重此次
隨同攻克堅城著准其在營戴罪圖功俟續有奇功再行奏請免
罪已革參將施鵬著照雷正綰所請暫畱軍營差委一俟新疆道
路疏通卽行飭令赴戍不准逗畱將此由六百里各諭令知之○
諭惲世臨奏湖南東西各界籌辦防堵誘獲曹元興正法一摺據

稱玉屏克復之後苗教各匪遁歸巢穴黎平髮逆伏匿未動惟各屬散練土匪時出滋擾教匪一股有與荆子園合併之信惲世臨已飭周洪印等軍駐黔境長吉瓦寨南洞司一帶先拒各匪出巢之路王永章各營駐紮沅晃以備調遣其黎平髮逆仍飭戈鑑會同粵軍剿辦湖北長陽匪徒占踞株栗山恃險抗拒該處緊接澧屬如鄂軍進剿難保不潰入湖南惲世臨豫飭黃元齡確探嚴防閩省賊糧缺乏度歲後意欲回竄江西見飭趙煥聯一軍留防東路各等語所籌東西各路防堵情形尙屬嚴密惲世臨前已因案降調當經諭旨簡放李瀚章爲湖南巡撫著該撫於抵任後嚴飭周洪印田宗揚等各率所部官軍進紮黔境會同黔省各軍將苗教股匪設法殲除並飭戈鑑督率兵勇與粵軍會合剿除黎平髮逆以清餘孽毋得稍存畛域致滋貽誤並著該撫檄令在防各軍

嚴防鄂閩各匪竄越以期有備無患李瀚章未到任以前卽著石贊清督飭各路帶兵員弁妥籌防剿不得存五日京兆之心稍涉推諉副將曹元興藉圖謀逆情罪重大見已擒獲正法所獲從人十六名著李瀚章等派員訊明辦理其餘黨眾並著飭令周洪印等咨會陳昌運妥爲撫馭嚴密防維儼不安分立即擒斬不可姑容在事出力各員著李瀚章查明保奏毋許冒濫將此由五百里諭知李瀚章並傳諭石贊清知之○以直隸等省雷雹災異下詔修省○甲申諭內閣前因烏魯木齊提督文祺由哈密進剿烏垣行至巴里坤病故業經降旨照提督軍營病故例賜卹茲據色普詩新將該故提督因病出缺情形奏聞並代遞遺摺披覽之下知該故提督之母年居七十六歲迎養哈密情殊可憫著再加恩所有該故提督任內一切處分悉予開復准其入城治喪其母暨該

提督靈樞回京時沿途地方官妥爲照料伊子英俊等著俟百日孝滿後由該旗帶領引見用示朝廷篤念盡臣至意尋予諡武毅○諭議政王軍機大臣等官文吳昌壽奏官軍進剿長陽縣土匪逆首率黨詐降立時擒斬見飭搜捕餘匪一摺田士信卽田思羣以土司後裔因案畏罪聚謀逆經官文等派軍兜拏將首從各逆一併擒斬辦理尙爲安速著官文等仍卽督飭水陸各軍乘勝掃穴殄除餘匪毋任一名漏網該處山徑紛歧並當責成地方文武各員隨時認真接捕以絕根株另片奏協甘餉銀請免籌解等語甘省克復固原州及肅河城等處軍務正在得手惟餉項奇絀艱苦異常必得各省齊心協力源源解濟方可收飽騰之效次第廓清楚省軍務已平江皖亦無須協濟若如所請強分畛域西陲大局將不可問每月應解甘省協餉銀三萬五千兩仍著懷遵前

旨籌解半年不得藉詞諉卸將此由五百里各諭令知之○乙酉
諭議政王軍機大臣等張之萬奏賊眾竄至汝境張曜等追蹕到
汝並回省料理省防覆陳寄諭各摺片逆眾盤旋西平境內數日
副將徐邦道等追至潛往劫營賊棄卡遁官軍追殺頗有斬獲該
匪由鄆城上蔡遂平交界之五溝營黃埠等處南竄沿途攻破民
寨裹脅丁壯其氛甚惡竄至汝郡潛伏城東欲圖攻襲經毛昶熙
督率地方文武嚴爲戒備刻下賊蹤肆蔓於正陽息縣新蔡之交
訊據獲賊供稱有由信陽竄往楚省之說徐邦道及張曜宋慶等
軍均已到汝僧格林沁亦自鄆陵拔營前進著督飭馬步各軍奮
力痛剿該匪懾於聲威自必南趨楚境當豫計其必由之路先行
派兵在彼多設埋伏或於山深林密之處多設旌旗以爲疑兵使
賊不敢竄近山谷如其入山負隅不妨率隊圍困使不得再出滋

擾著該親王相機妥籌辦理僧格林沁忠勇性成急於滅賊而於該匪狡詐百出之處或非意料所及上兵伐謀須令人不可測度未可一意跟追再墮狡計近日軍情賊勢並須趕緊馳奏以慰懸繫正息等處距光羅不遠前經諭令如賊氛竄近楚省令官文在省守禦吳昌壽出省督剿此股賊匪游魂無定必將擾及楚邊著吳昌壽卽行調集勁旅剋日出省擇要防剿攔頭夾擊以期速殄狂氛潁州密邇寇蹤遠防不如近剿著喬松年卽行移紮潁州一帶親督英翰等所部各隊嚴密防堵其駐防皖境之劉銘傳等軍卽著飭令整頓隊伍移營前進如賊氛竄近光固該提督等卽行出境攔截痛加殲剿不可以有用之兵株守本境詹啟綸勇隊已到何處著僧格林沁嚴行催提到汝責令隨剿毋任沿途逗遛總之此股賊匪東奔西突大爲腹地之患必須喬松年吳昌壽親督

皖楚在防各軍出省與僧格林沁之軍會合一處前截後追方能制其死命該撫等惟當嚴飭將士等不可稍有畛域之見致成不了之局汝甯防務緊要毛昶熙既在郡城當飭令在城文武兵弁齊心守禦俟大兵到汝整隊出城夾擊毋失事機張之萬見在回省卽著將省城守禦各事宜認真布置並將積壓地方公事督同司道認真清釐並著僧格林沁隨時察看軍情如必須張之萬出省卽行飛咨該撫遵辦可也將此由六百里各諭令知之○丙戌諭內閣前因御史劉慶奏參鄭親王承志品行不端各款當經諭令宗人府會同刑部提集案內各犯嚴行審訊茲據奏稱審明承志被參各款大概情形惟狎優比匪一節該親王堅不承認並據常四王姓卽小一子金三卽金廣元等雖供稱唱戲均與鄭親王素不相識並無聚會演唱情事崔德善則堅稱不會唱戲亦與鄭

親王素不相識請飭原參御史指實覆奏等語案關親王被劾狎
暱優伶最爲案中緊要情節必須確切究明方足以成信讞劉慶
所參承志與優人常四小一子及崔姓聚會演唱一款是否確有
實據著該御史再行詳細指實覆奏以憑訊辦○左宗棠徐宗幹
奏劉典王德榜兩軍由連城進駐朋口莒溪後汪海洋仍堅踞南
陽並分黨盤踞古田下車南嶺馬洋洞涂坊一帶以阻官軍進攻
之路劉典當於駐守連城各營內抽調三營進紮文坊總兵王開
琳率所部與道員張恆祥凱營全部進駐汀南四十里河田並規
南陽賊巢上年十二月二十五二十六等日王開琳張恆祥等督
軍進剿涂坊斃賊多名賊不少卻時江西撫臣沈葆楨飭調援閩
之道員王文瑞所部新湘九營已抵汀州正月初七日王開琳遂
率所部及新湘九營進駐涂坊賊出零股千餘意圖牽掣王開琳

麾各營擊走之將賊館悉數埽除追至南嶺有賊屯聚十二夜間各營踰嶺進剿守賊棄卡竄遁追斬三百餘人墮崖落淵死者無算賊不能支分向南陽遁去當王開琳等之進紮涂坊也劉典先飭李耀南張福齊兩軍進紮楊家坊另撥三營填紮明口並會商王德榜扼紮廟前以期漸合長圍十一日李耀南等移營時王德榜復派各營出隊助之賊伏不出王德榜隨帶輕騎馳赴下車一帶察探路徑見下車馬洋洞以至南陽一帶賊卡層層密布必先克其要隘始可進取南陽是夜飭戴奉聘等分三路急攻下車賊不意官軍突至遂駭而奔官軍追殺直至馬洋洞該處踞逆爲敗賊牽動不攻自潰比曉始收隊還計是役斃賊七八百名生擒三十七名斬僞王宗汪運勝等於陣其高連陞黃少春兩軍扼紮漳州東北自去臘賊竄長泰截剿獲勝後因侍逆李侍賢尙踞渡東

浦南一帶時圖乘隙窺犯黃少春於十二月二十四日分飭各營
向前挑戰適遇大股悍賊擁擁而來待其撲近洋槍隊一齊排擊
斃賊百餘名賊眾敗走追至浦南河邊詎渡東之賊萬餘從山後
鈔出浦南之賊亦分數千沿河而上勢極兇悍高連陞當飭丁賢
發力堵河邊自督錢桂仁程學明等奮威衝殺黃少春率馬步百
餘人馳至丁賢發將沿河之賊擊退亦率所部橫截而出賊眾披
靡黃少春高連陞復揮軍追至河邊侍逆親率悍黨抵拒洋槍隊
連環轟擊賊敗入村程學明錢桂仁等過河追殺數里而還正月
初二日侍逆率大隊分兩路從東北門出圖犯高連陞黃少春營
壘官軍堅壁以待賊知官軍難撼旋即退入漳城堅踞不出其永
定縣城被賊竄陷後經總兵關鎮國等會合廣東副將方耀等軍
悉剿獲勝十二月二十八日粵軍進擊西門守備李仰山知縣張

行楷等會督團勇分布東南兩門併力圍攻二十九日該逆由東門竄走張行楷等當將縣城收復其龍巖州城之賊於正月二十三日分撲鐵石洋大營康國器督各營力戰卻之古田之逆率黨萬餘至小池來援次日康國器督軍力戰斃賊二千餘人是夜各營緊攻州城東北槍礮齊施賊眾冒雨啟南門出走各營躡蹤剿殺當將龍巖州城克復臣等見飭康國器畱兩營守龍巖仍率各營追剿一面飭總兵劉明珍率所部由白沙劉端冕等由永安甯洋漳平均出華封司以厚漳州兵力絕賊內犯安溪之路與長泰官軍聯絡一面調總兵劉清亮由浦城帶所部湘軍三千由省城出興化趨泉州同安以固高連陞黃少春後路俟劉興王德榜等將汪逆南陽老巢埽除賊勢蹙而兵力敷乃可漸圖蒞事 上諭議政王軍機大臣等王德榜劉興王開琳等軍將涂坊賊館埽除

連奪下車馬洋洞等要隘餘匪俱向南陽奔竄永定縣城總兵關鎮國同粵軍攻克康國器克復龍巖辦理尙爲得力惟漳州踞逆號稱二十萬人逆倭尙張汪逆尙踞南陽相爲犄角左宗棠見飭總兵劉清亮出興化趨泉州同安以固高連陞等軍後路並分布諸軍於永安甯洋漳平等處以厚漳州兵力兼杜賊犯安溪之路布置尙爲周密渡東浦南踞匪已爲黃少春高連陞兩軍擊敗侍逆退縮漳城堅踞不出著左宗棠督率諸軍乘此聲威力籌進攻並激勵劉典王德榜等軍速將南陽賊巢掃蕩以便進兵合圍漳城毋稍遲緩前據毛鴻賓等奏稱方耀一軍會合閩兵克復永定餘匪竄向龍巖見在龍巖股匪究向何處逃逸著左宗棠查明具奏並將此股殘匪速行截擊乘勢殄盡毋令竄併汀漳徐宗幹亦當督飭地方各官聯絡鄉團嚴扼要隘毋任敗賊紛竄致滋蔓延

前經諭令毛鴻賓等飭令方勱聽候左宗棠調派會合閩浙官軍
進攻並令李福泰進駐潮州著瑞麟郭嵩燾迅遵前旨辦理一面
嚴扼要隘毋令閩匪竄入粵疆仍當不分畛域力圖越境會剿以
期速靖邊圉將此由六百里各諭令知之○諭明緒奏覆陳防剿
情形並賊氛倡擾收集兵勇紮營防堵各一摺巴燕岱城與伊犁
臂齒相依伊城煤米一切向皆仰給巴城明緒因巴燕岱被圍甚
急派兵前往救援乃官兵始勝終挫傷亡多名槍礮器械遺失不
少皆由賊眾我寡以致失利所有帶兵之武隆額榮全布爾和德
錫拉那額騰額等著准照明緒所請此次暫免查辦卽責令督率
兵勇奮勉圖功以觀後效佐領額騰額既能熟悉地方情形所有
武隆額辦事大臣關防卽著交額騰額祇領武隆額卽仍畱明緒
軍營俾供差遣前任撫民同知崇熙平日深得軍民之心見在伊

率軍務緊要著賞給崇熙四品頂帶開復原官派令在額騰額軍營幫辦一切以資得力當此賊勢蔓延兇鋒正銳明緒務當拊循激勵妥籌防剿以待援兵槍礮爲行軍利器明緒見於伊犁城內查出舊存鐵塊派員監工鑄造所辦甚屬認真卽著督飭榮全等晝夜趕辦以利攻擊應用馬匹米糧等件並著設法購買俾資利濟哈薩克聚眾搶掠並將俄人貿易囤地什物搶去事起倉卒難保非逆回勾結所致見在哈薩克已否解散安集延人眾逃往何方有無通回情事著明緒查明具奏伊犁差委之人明緒所保之員外郎銜印房主事景崙著加恩賞給四品頂帶花翎責令總辦軍需局務如能著有成效著明緒據實保奏儻始勤終怠卽著隨時甄劾毋稍回護革員陳孚恩樂斌均著交明緒差遣委用聯捷未到任以前伊犁參贊大臣卽著榮全暫行兼署塔爾巴哈台防

守亦關緊要博勒果素援兵既經錫霖截畱卽著咨令嚴防塔城毋庸勉強赴伊以致顧此失彼俄國之兵如能剋期前來明緒當恪遵前旨事事熟籌妥辦明緒到伊以後尙得民心該將軍經朝廷簡擢重任惟當加意奮勉以濟時艱不得稍存諉卸之念致負委任將此由六百里諭令知之○廣江西臨江府學額五名新喻縣十名○予巴燕岱陣亡協領穆克德柯等祭葬世職○丁亥諭議政王軍機大臣等都與阿穆圖善奏統籌剿辦情形一摺甯夏攻剿回匪見在正當喫緊之時未能抽兵出關遽援新疆自係實在情形惟烏魯木齊等處疊就淪陷伊犁等城岌岌可危該將軍大臣等飛章呼籲望救甚殷豈能置之度外自應速將甯夏一帶肅清以便趕緊分兵出關援應都與阿等見攻甯夏城北賊圩雖小有斬獲而賊勢未衰尙復踞巢堅拒著卽督率將士實力進攻

速拔堅城以期先清甘境雷正綰一軍已克固原必須迅將靈州一帶賊氛掃蕩庶可與都興阿等軍會攻甯夏卽著懷遵前旨實力辦理前經疊諭楊岳斌速赴甘省以刻下情形而論非楊岳斌迅速到甘不能騰出兵力進援新疆該督受恩深重具有天良諒不至稍事遷延致滋貽誤也髮捻各匪竄擾豫省勢尙鴟張詹啟綸等軍見隨僧格林沁追剿正當喫緊之時未能卽赴甘省都興阿等惟當就見有兵力迅速圖功毋得專待增兵致延時日哈密防守最關緊要鶴齡旣未能迅往該城卽著都興阿將派出之官兵五百名飭令趕緊前往交護總兵德祥統帶赴哈以資防守將此由六百里各諭令知之○諭張凱嵩奏剿辦梧州府屬餘匪疊獲勝仗並攻勦永瀆匪徒攻拔大廟見飭乘勝進兵各一摺前據毛鴻賓等奏廣西藤縣岑溪等處復有匪眾嘯聚派曾敏行等帶

兵會剿等語當經諭令張凱嵩妥籌剿辦並將起事詳細情形查明據實具奏茲覽該撫所奏進剿各情賊鋒雖經屢挫而南渡晏容兩渠土匪尙眾外匪麇至且霍十八張庭瀉等首逆亦未殲除若不迅圖掃蕩必致日久蔓延著張凱嵩督飭蔣澤春吳光春姚茂田等增兵募勇剋日進攻一面催提曾敏行一軍由羅定等處會合夾擊盡殄賊氛不准敷衍了事又畱後患永瀉匪首孫芒廣盤踞江檀老巢四出滋擾經劉坤一等督兵進剿疊獲勝仗且將悍逆辜樹方陣斃並攻拔大廟堅巢是該匪犄角已失乘勝進兵必可擒渠掃穴著卽檄飭劉坤一等審酌機宜申明賞罰督同李士恩等鼓行而前迅圖蕪事將此由五百里諭令知之○諭沈桂芬迅籌銀二三萬兩濟甯夏軍糈○諭官文等籌撥都興阿軍餉○予安徽殉難州同沈堃等祭葬世職○刑部尙書趙光卒予祭

葬謚文恪○戊子諭內閣前據吏部奏議兩廣總督毛鴻賓被參各款處分當經降旨照部議降一級調用不准抵銷茲據該部奏稱查毛鴻賓前因移獎子弟案內業經奉旨革職畱任復因案議以降調不准抵銷例應革任俟革畱之案限期屆滿題請開復仍照原議降調處分以所降之級調用各等語毛鴻賓任內既有革職畱任之案茲復因降調不准抵銷著卽照例革任俟年限屆滿再由該部照例辦理該部承辦司員於遵議毛鴻賓處分摺內漏未聲敘雖係自行查出檢舉究屬疏忽著查取職名交都察院議處○諭議政王軍機大臣等沈葆楨奏閩省踞逆竄動籌備邊防情形一摺福建龍巖州城克復後餘賊入漳南陽汪逆竄上杭所屬之白沙地方沈葆楨已檄席寶田由石城劉勝祥由廣昌督隊西馳並調礮船上駛著卽督飭在防諸軍申嚴守備令吉賴戰船

跟蹤上駛僮逆眾西趨卽行迎頭截擊前據該撫奏請給假回籍
省親當已降旨允准茲據奏稱邊防復行喫緊如前摺邀允仍暫
緩回閩悉心調度實能視國如家深堪嘉尙沈葆楨卽著暫緩回
籍俟江省防務稍鬆邊境無事再行回家省視該匪圖襲贛南窺
伺兩楚湖南與江西交界地方防務亦關緊要李瀚章已簡授湖
南巡撫著卽趕緊赴湘整頓防兵認真辦理未到以前石贊清暫
護撫篆亦屬責無旁貸著嚴飭文武地方各員妥籌防剿不得視
爲緩圖白沙地方左通潮州嘉應右達長甯會昌雖入粵入江蹤
迹不定總當前截後追就地殄滅方爲妥善左宗棠務當督率各
軍趕緊追躡毋任竄擾鄰封又滋延蔓湖嘉各屬瑞麟郭嵩燾卽
飭李福泰等防軍認真防範如賊蹤竄近卽行越境兜剿以固邊
防方耀一軍能否回顧並令酌度緩急妥籌兼顧將此由六百里

諭知瑞齡左宗棠徐宗幹李瀚章沈葆楨郭嵩燾並傳諭石贊清知之○以齊承彥爲刑部尙書曹毓瑛爲左都御史畢道遠爲兵部左侍郎候補侍郎○己丑毛鴻賓郭嵩燾奏福建臬司張運蘭於上

年八月二十六日行抵汀郡因賊匪由平遠大埔被剿回竄武平卽於九月初四日統兵馳赴武平扼剿初十日畱勇守城親督中隊馳赴中赤迎剿屢戰皆捷中赤山多林密賊遁其間十一日追賊深入伏賊突起包鈔而另股賊匪已撲武平因卽督隊回救不料賊眾兵單重重被困總兵賀國楨王明高先後陣亡張運蘭見勢不支持刀策馬大呼陷陣所向皆靡奈賊匪愈聚愈眾前者被傷後者繼進親兵死傷略盡張運蘭身受重傷墜於馬下爲賊擒擁入城守禁兩日張運蘭罵不絕口遂於十四日遇害被賊支解甚慘查張運蘭係湖南湘鄉縣人於咸豐元年從戎轉戰江西安

徵湖南廣東湖北數省大小百餘戰屢克名城爲江皖傑出之員

同治二年

臣

鴻賓抵任粵督稔知廣東數年來徧地賊氛兵威不

振因商之兩江督

臣

曾國藩將該員奏帶來粵先後剿滅石逆餘

黨李幅猷並掃除土匪粵省十餘年積患爲之一清及遵旨赴閩

提二千之眾當十萬之寇一鼓作氣誓不與賊俱生徒以眾寡不

敵中賊詭計卒能臨難不屈大節凜然合無仰懇

天恩將布政

使銜福建按察使張運蘭照巡撫陣亡例議卹宣付史館立傳並

於湖南福建廣東各省建立專祠以彰忠藎出自

天恩再其長

子業已出繼次子恆湘年甫數齡孤露餘生情堪憫惻合併陳明

上諭內閣福建按察使張運蘭自咸豐元年帶兵剿賊轉戰江

西安徵湖南廣東湖北等省屢克名城疊著戰功上年經毛鴻賓

奏帶赴粵先後剿滅石逆餘黨李幅猷及土匪鄧二尺七陳仰古

等肅清粵省十餘年積患方冀千城之選倚畀堪資乃於去年八月間帶兵救援福建因平遠大埔之賊回竄武平該臬司親督中隊馳赴中赤迎剿屢戰皆捷遽以追賊深入爲逆眾層層圍裹總兵賀國楨王明高先後陣亡帳下親兵死傷略盡該臬司身受重傷爲賊蜂擁入城罵不絕口遂於九月十四日被賊支解覽其臨陣之勇死事之烈忠節卓著痛惜殊深布政使銜福建按察使張運蘭著加恩照巡撫陣亡例議卹任內一切處分悉予開復並於湖南福建廣東各省建祠生平戰績並著宣付史館立傳伊子張恆湘著俟服闋後由吏部帶領引見以示篤念忠藎至意尋予祭葬世職諡忠毅○諭議政王軍機大臣等恩麟等奏擊退靖遠逆匪縣城解圍見籌分兵兼顧西路平番縣城圍稍鬆請飭曹克忠等赴援並靈臺縣被賊攻陷請飭劉蓉就地籌防各摺片靖遠被

圍陶茂林督隊衝擊平毀賊巢城圍立解連日周歷按捕附近數
十里均無賊蹤惟哀鴻嗷嗷滿目陶茂林已入城安撫良回卽著
督飭地方官加意撫綏仍督率各營將弁剿捕竄逆毋任四散滋
擾河狄回匪雖有就撫之說其心反覆無常萬難深恃著恩麟加
意嚴防毋稍大意平番回匪竄入省北秦王川一帶該處爲產糧
要區省城民食所賴陶茂林將靖遠大局布置定妥卽酌帶勁旅
先赴秦王川會同恩麟所派之宣威各軍殄滅竄匪卽赴平番助
剿以顧西路門戶鞏昌望援日切恩麟請令曹克忠率領全部專
顧鞏昌俟該處賊匪蕩平卽與陶茂林合軍規取河狄曹克忠一
軍自肅河城等處剿撫兼施見在應由何路進兵能否令赴鞏昌
之處著都興阿穆圖善雷正綰悉心酌覈一面奏聞一面檄飭該
總兵照辦甯夏未復匪勢正熾都興阿穆圖善未能迅撥勁旅援

應平番著恩麟懌遵正月二十九日所奉寄諭責令黎獻調集兵
勇妥籌辦理總須俟甯夏克復後方能分兵兼顧此時有陶茂林
一軍前往情形當可稍鬆該護督惟當就各路見有兵力妥籌辦
法無庸日事呼籲爲也另片奏靈臺縣城被賊攻陷劉蓉請將曹
克忠全部十六營畱防邠長汧隴該護督請畱曹克忠在甘省專
意剿匪請飭劉蓉暫行就地籌防等情靈臺被陷旋經官軍克復
前此由甯州竄擾白吉原之匪想卽此股分竄著劉蓉檄飭彭基
品等並雷正綰所派馬隊迅將白吉原股匪奮力殄除毋畱餘孽
雷正綰前奏曹克忠札調洮州土司楊元鑾兵一千名到營助剿
能否得力之處仍著隨時查明具奏將此由六百里諭知都興阿
穆圖善雷正綰劉蓉並傳諭陶茂林恩麟知之○以王德榜爲福
建按察使

記名按察使

○于甘肅陣亡提督高餘慶副將謝萬年遊擊

王繼祥等祭葬世職○辛卯諭議政王軍機大臣等劉蓉奏官軍
進剿階州逆匪屢勝踞平雨水等處賊壘並將竄出股匪追剿殆
盡一摺另片奏鮑超軍餉陝省無力協濟等語蔡逆竄踞階州負
隅犄角經官軍設法攻剿移營進逼絕其援應斷其米糧逆勢窮
蹙遠圖分股奔竄以遲狡謀復經蕭慶高周達武等督率各軍奮
勇剿殺使踞逆不敢動移逸賊悉遭俘馘剿辦甚爲得手著胡中
和懷遠前旨統率三路援軍乘此屢捷之威埽除三官殿等處餘
壘攻拔堅城殲渠擒穴劉蓉摺內奏稱接據蕭慶高來函謂於月
底總可奏功等語是逆勢因迫已同檻獸釜魚駱秉章劉蓉胡中
和務當督令蕭慶高等同心協力穩慎圍攻毋令逆匪紛竄功隳
垂成懷之慎之其川省毗連甘省地方並著駱秉章豫派兵勇扼
要駐紮以資策應陝省兵燹之餘賦稅支絀劉蓉所奏自係實在

情形惟新疆地處沙漠用兵首重轉運必須陝西等省合力協濟方無匱乏之虞見在鮑超同川募勇出關尙需時日指顧階州事竣即可斟酌情形騰出餉銀應鮑超西行之用仍著劉蓉督飭藩司豫籌接濟每月可撥若干酌定數目具奏不得畏難推諉致令他省效尤貽誤大局將此由六百里諭知駱秉章劉蓉並傳諭胡中和知之○予甘肅陣亡總兵官張貽輝副將雷濟泰祭葬世職○壬辰諭內閣前因雷正綰奏攻克固原州城大獲勝仗並攻克肅河城等處逆壘已明降諭旨宣示見在甘肅大兵雲集該逆敗潰之餘剋日可期殄滅惟念同眾良莠不齊其甘心謀逆戕官踞城各犯屢抗天討荼毒閭閻實爲國法所不容人心所共憤惟其中亦有安分良民或始終未入逆黨或被賊匪脅從天戈所指儻致玉石俱焚朝廷好生之心實所不忍著甘肅統兵各大員於大

軍經過各地方確切查明回民中如有結連善類固守堡寨與賊相持者卽行獎勵拊循以資觀感其或迫於賊勢勉強附從大兵一臨或繳械投誠或捆獻首逆亦可曲加寬宥予以自新該回民等食毛踐土數百餘年國家一視同仁與內地漢民原無區別各統兵大臣務當仰體朝廷法外施仁至意妥爲辦理但分良莠不分漢回除積年巨憝法所不貸外其餘被脅人等果係真心效順卽無庸概予駢誅該回民等於就撫後各宜蕩穢滌瑕同安耕鑿該漢民亦須馴順安分共泯猜嫌如同漢各民嗣後再有挾私逞忿之舉朝廷必當盡法懲治不能屢邀寬典也○諭議政王軍機大臣等上年江甯克復後曾國荃因病陳請開缺回籍調理當經降旨令該撫病痊後卽行來京陛見迄今已及半載該撫病體當可漸次就愈朝廷以該撫功績昭著且年力盛強正可藉資倚任

著曾國藩傳知曾國荃如病已就痊卽行來京陛見見當勤求治
理需才孔亟之時該撫慎勿遽萌功成身退之志以副期望將此
諭令知之○諭富明阿從征有年受傷多處此次肅清皖北坐鎮
淮南尤屬功績卓著茲以骸傷未愈步履維艱力請開缺該將軍
老成重望朝廷倚畀方殷豈能遽允所請茲已賞假四箇月富明
阿卽可來京就醫其江甯將軍印務卽交魁玉署理江甯地方新
復旗營亟須整頓魁玉著卽馳赴江甯體察情形將應辦各事宜
次第妥辦以副委任將此各諭令知之○諭雷正綰奏見籌進剿
機宜分別良莠安插降回一摺固原地險城堅甫經克復彈壓撫
綏均關緊要雷正綰已派提督劉正高入城鎮撫著卽飭該提督
慎固防守降眾張保龍與陝省叛黨已成仇敵踊躍用命卽著飭
令將挑出各壯丁作爲前隊殺賊自效如能奮勇出力據實奏聞

其各處乞撫回眾並著雷正綰分別良莠妥爲安置總期恩威並濟毋貽後患目前逆鋒大挫正宜乘勢進取著雷正綰卽統帶各營由李旺堡同心城一帶節節逼剿並嚴飭派出之提督譚玉龍等由黑城子一帶埽蕩而前雷正綰務當穩慎進取與都興阿穆圖善會攻靈臺以收廓清之效雷正綰奏稱河狄回尙斂迹洮鞏軍勢亦覺稍安擬飭曹克忠攻剿會甯合軍北向著都興阿穆圖善雷正綰妥籌調度如令曹克忠聯絡北行卽飭令先將會甯踞進攻克並將竄至鹽茶之陝逆殄除淨盡合兵規取靈甯或鞏昌待援尙急亦著都興阿等體察緩急情形酌度辦理陶茂林一軍前曾諭令剿辦秦王川竄匪後赴援平番惟曹克忠之軍北向則甘省東南一帶空虛如陶茂林能剋期將平番逆匪剿滅卽飭令回軍扼紮安會居中控制牽綴河狄洮鞏賊勢相機進取總之軍

情萬變瞬息不同該將軍等必須通籌全局庶不至顧此失彼左
紕右支也雷正綰奏鹽茶一帶同民尙稱良懦請分別良莠期撫
兼施本日已明降諭旨剴切曉諭卽著雷正綰於接奉後刊刻謄
黃出示招撫以釋清疑而安反側惟仍須隨時察看不可草率遷
就貽患將來將此由六百里各諭令知之○諭勞崇光奏雲南官
軍剿辦曲尋逆回擒斬逆首進東肅清一摺據稱上年七月間勞
崇光派遊擊馮世興酌帶親兵練勇馳赴曲尋一帶會同馬如龍
等奮力進攻連日殲斃逆回無算先後將尋甸州曲靖府城收復
並擒獲逆首馬榮馬聯升等業將馬聯升在軍前正法其馬榮一
犯亦經該督札飭解赴雲南省城交署臬司宋延春驗明正法岑
毓英馬如龍等調兵練力挫兇鋒收復城池督擒首犯均屬勇敢
過人請將馬如龍等仍照原請給獎等語馬如龍等旣據該督聲

稱此次肅清曲尋擒斬逆首實係異常出力自應量予獎敘以昭
激勸本日已明降諭旨照勞崇光所請給獎矣滇省迤東見已肅
清卽當檄飭諸軍進規大理以目前時勢而論亟須督撫大吏前
赴滇中督辦指授機宜使各軍有所稟承事權旣歸盡一始可迅
蕲全功如但委之馬如龍等非但諸軍無所統壹且恐成尾大不
掉之勢勞崇光身任雲貴總督責無旁貸且於馬如龍等均信其
可恃自必熟籌駕馭之方該督遠在黔垣僅能遙爲控制不如進
紮滇省於一切攻剿機宜可以就近籌度著勞崇光酌帶兵練剋
期赴滇或於東昭兩府擇要駐紮或徑赴曲靖近控省垣均卽迅
速籌維相機前進毋得稍涉遷延致負委任林鴻年簡任滇撫屢
經諭令進紮東昭見在滇省東路疏通著林鴻年懷遵前旨剋日
啟行毋再延緩並著駱秉章懷遵疊次寄諭迅籌餉銀數萬交林

鴻年帶往並於唐友耕劉嶽昭所部兩軍悉心審度卽川省邊防緊要未能全行撤赴滇省或先抽撥數營隨林鴻年前往該督素顧大局必能不分畛域妥籌迅辦林鴻年亦不得藉口兵餉未裕仍行安坐川垣致誤事機勞崇光林鴻年於滇省軍事總當和衷所辦不得因所奏各情互有歧異遂致稍涉齟齬馬如龍既係誠心效順何以臨安紳民所稟有率眾圍攻江川之說是否實有其事有無別故仍著勞崇光等隨時察看諭以大義飭令馬如龍蠲除私忿約束回眾毋許再啟釁端並可札飭梁士美等告以馬如龍見已力圖自效卽當與之同心協力進規迤西一意以殲除杜逆爲事楊盛宗與馬如龍梁士美等素均無忤並著該督等督飭楊盛宗與之聯絡會剿進攻馬如龍等此次已加優獎儻遷延疑貳有始無終仍著勞崇光據實參辦勞崇光等如不能妥爲駕馭

致馬如龍等或生反側貽誤事機亦必治勞崇光以應得之罪懷之愼之將此由六百里諭令知之○諭勞崇光張亮基奏籌辦黔省各屬軍務情形天柱縣城復失各摺片定番之匪由羅斛旁竄大塘直逼汛城經鄧爾巽等擊敗該逆竄回壩茫老巢遵義號匪勾結苗匪擾及正安州境官軍次第掃蕩餘匪見仍退回興義逆首張凌翔馬河圖業經正法郡城內外肅清新城貞豐匪勢已孤見經興義等府廳集練進攻該省到處皆賊雖據該督等奏稱各路疊有斬獲亦止小有勝仗並未痛殄逆氛著勞崇光張亮基督飭派出官軍分路進攻次第肅清疆圉惟當實力剿辦底定邊陲不得一味敷衍粉飾養癰致貽無窮之患平遠鎮甯郎岱等處竄匪勾結黔西之賊闖入大定府城著勞崇光張亮基嚴檄知府畢大錫等軍將此股逆匪迅就殲除一面將該城文武下落迅速查

明具奏清江台拱苗匪復出巢竄陷天柱縣分爲四股以兩股擾楚邊以兩股竄黎平古州髮匪又逸入永從前楚軍以賊已出境全數撤回惟廣西楊廷桂一軍由古宜帶隊援剿兵力實形單薄著李瀚章石贊清抽撥勁旅前赴天柱一帶協力會攻迅殲羣醜毋得稍分畛域勞崇光本日已諭令赴滇督辦軍務黔省剿匪事宜卽責成張亮基認真辦理以副委任林自清著准其署理安義鎮總兵能否得力仍著該督撫隨時察看將此由六百里諭知勞崇光張亮基李瀚章並傳諭石贊清知之○諭張亮基奏滇黔全局攸關籲請酌撥江浙勁兵楚粵釐稅以圖大舉一招據稱滇黔十年兵燹民命倒懸以見在而論滇匪猜攜自構機有可乘黔匪脅從日多勢將轉熾惟及時而大舉庶息燄於燎原請抽撥東南得勝之師選擇將領力加埽蕩其廣東特設督辦之釐金與湖南

東征局之餉款請分潤滇黔先爲酌撥俟東南軍務告竣再以盡
贍邊軍並派良將勁兵速抵黔省將苗教之匪次第剪除然後併
台黔師分臨滇境示以禍福喻以恩威自可覲覲潛消又安永慶
等語滇黔慘遭蹂躪十有餘年誰非朝廷赤子豈忍坐視其顛危
而不一拯救惟以東南未盡蕩平西北尤關緊要是以徵兵籌餉
不得不先清腹地再顧邊陲茲幸江浙肅清東南底定張亮基身
任黔撫自不得不爲滇黔籌畫曾國藩等前奏遣撤楚勇能否派
員酌帶赴黔交張亮基調遣及各省釐金能否酌量先爲分撥若
干以資接濟之處著曾國藩李鴻章妥爲區畫該大臣等向能不
分畛域諒不以地屬邊陲稍存膜視也原摺著鈔給閱看將此由
六百里各諭令知之○以雲南曲靖尋甸勒匪獲勝生擒首逆總
兵官馬如龍道員岑毓英得旨嘉獎並賞巴圖魯名號餘升敘有

差○子貴州陣亡同知胡元英祭葬世職○癸巳左宗棠徐宗幹奏劉典王德榜王開琳張恆祥等軍由汀州連城進剿下車南嶺馬洋洞涂坊賊巢迫攻破賊巢後均各移營進紮劉典復飭總兵楊芳桂等會合各軍分路攻剿於正月二十二日直逼南陽汪逆老巢連日疊破賊壘數座斃賊無數陣斬僞王宗汪海林等多名二十四日王德榜等分軍猛攻古田賊壘賊隊大亂官軍乘勢殺入斃賊千餘名生擒百餘名解散者約數千李運勝等乘勝逐北二十五日追至小池賊見官軍倏至拌死回撲李運勝等分路鈔擊斃騎馬悍賊數名逆賊千餘名賊遂大敗官軍躡之甫抵白吐忽見龍巖城內火光燭天賊繞向坎頭鼠竄旋偵知龍巖州城已爲康國楨一軍攻破矣二十六日李運勝等始收隊而還其王開琳一軍亦於二十二日分飭總兵鄧榮達由右路出長橋自率各

營進羅源嶺逆賊踞險築卡官軍仰攻殊難王開琳飭莫坤和等
各挑趙捷勇丁攜帶噴筒火箭從兩邊山麓猱騰而上傷親兵張
加勝等六十人從中路槍礮中拔柵直入立斬卡外悍賊數名羣
賊駭潰羅瑞山等乘勢焚其望樓立將羅源嶺隘攻克追過嶺後
瞥見賊立石卡兩座旁以四壘護之羣賊蟻擁而出羅瑞山等奮
力衝殺陣斬黃衣賊目一名賊不少卻適康榮詔等從嶺凹鈔出
兩路夾擊賊始奪路狂竄官軍正追殺間忽僞天將胡瞎子率悍
黨萬餘擁至各敗逆仍拌死回闕王開琳飭各營堵禦左右奮擊
斃賊無算是役共斃賊二千餘名生擒四十餘名其張恆祥一軍
於二十一日由南嶺攻破香塔賊卡殺賊百餘名餘賊向白雲嶺
井發坑兩處藏匿二十二日進剿白雲嶺井發坑又破之殺賊數
百名生擒賊目八名正擬收隊適大股悍賊從茶樹下撲出圍鈔

官軍後路經王開琳所部擊敗生擒偽天將孫學保張鴻瞬等悍賊三十四名斃賊一千餘名汪逆海洋兇狡素著雖經屢次擊敗然其死黨尙蓄銳以待意圖伺隙衝突以赴李逆之招二十七日劉典飭李耀南張福齊所部各營會合王德榜一軍進新泉截之王德榜率所部五營由馬洋洞赴下車先進行至馬洋洞適汪逆已率悍黨數萬分路而至官軍分隊迎擊馳入賊陣立斬賊目數名賊勢稍卻後面賊隊仍一擁而上郭慶雲等各率所部衝殺賊敗踞山邊汪逆復驅令同撲官軍勢幾不支李耀南等嚴督各營勿退一步劉典策馬馳至分飭各營從旁鈔襲自率親兵向前力戰縱橫決盪賊大敗走而新泉對岸之賊仍穩踞不動劉典率親兵左右翼沿河疾進行甫半里汪逆率死黨千餘拚死扼堵余佑民督隊首先陷陣李耀南等衝過山岡四面蹙之立斃悍賊數百

名時王德榜亦將撲營之賊擊退率所部分路衝殺而前該逆悉
梟水向西南逃竄溺死不少退至下車劉典王德榜揮軍蹣跼前
後夾擊又斃悍賊千餘名汪逆下馬痛哭倉卒閒幾爲官軍所獲
旋爲其死黨擁之翻山逸去是役共斃賊五六千名生擒四百餘
名陣斬僞天將陳姓李姓等賊目多名其僞先鋒胡瞎子爲賊中
兇悍頭目是戰亦爲官軍刀矛叢刺而死據獲賊供稱汪逆選諸
賊之悍者令執大旗衣以黃白號衣名爲標旗手厚待之遇有危
急輒麾之向前自號無敵至是而喪失過半矣其總兵劉明珍護
汀漳龍道趙均聞龍巖既克卽率所部進紮漳平南路永福里見
敗逆尙屯聚數十里內花旗丁汰洋一股橫踞水潮和溪一帶二
十七日劉明珍率所部分路進剿該逆四五百人出隊搦戰劉明
珍督各營突前奮擊賊卽潰走官軍追殺數里斃賊七百餘名是

夜偵知賊復圖回踞新林劉明珍遣參將王啟發等前往襲之
將賊十三座踏毀其漳州踞逆李侍賢於正月二十日分路竄犯
漳浦高連陞等分督諸軍由海澄石碼等處進攻城賊率眾出拒
官軍隔河環施槍礮斃賊百餘名餘賊敗走入城二十九日復有
賊騎數十至景山一帶游弋高連陞派隊躡擊追至橋邊伏賊
突起官軍洋槍隊連環轟擊並分兵繞出賊後兜剿擊斃悍賊數
百名三十日該逆突出悍賊三四千已破曾玉明丹洲陸營直趨
鎮門師船潰退賊跟追正急程學明用洋礮隔河轟擊該逆未能
遽逞高連陞卽飭洋槍隊向前排擊並令遊擊蕭立信等渡河直
抵丹洲以劈山礮截賊歸路轟擊逾時賊始敗遁高連陞親督各
勇馳至生擒悍逆三百餘名餘逆殲剿殆盡據獲賊供稱李侍賢
戰敗時猶乘一白馬殿後今見其馬爲官軍所牽李侍賢或已梟

水逃走竊思汪逆盤踞南陽與李逆實相首尾今幸兩路均獲大捷賊之精銳喪失過半兩逆經此重創膽落可知以見在局勢而論江西廣東邊防尙固又入春以來陰雨兼旬山水暴漲該逆竄越維艱惟漳州南境地濱大海賊勢雖極窮蹙斷無引領待戮之理此時自以嚴防下海爲要臣等見檄署衢州鎮總兵劉清亮率所部由同安徑趨石碼以保漳州東南一路並咨新授水師提督吳全美速雇紅單拖督等船赴閩助剿以固海防昨准李鴻章咨稱擬飭提督郭松林楊鼎勳各率所部雇坐輪船由海道赴廈門如各軍齊至節節掃蕩東南餘逆可冀盡殲此次各路官軍以寡勝眾實由將領殫心竭力得以速赴戎機其尤爲出力之提督高連陞等可否仰懇天恩給予獎勵此外出力將士尙多可否由臣等存記彙奏請獎其力戰陣亡之擬保總兵哈必發擬保守備

王福泰可否飭部各就擬保官階照陣亡例議卹 上諭議政王
軍機大臣等劉典王德榜等軍進剿汪逆疊破賊壘續獲大勝該
逆痛哭逸去幾爲官軍所獲劉明珍等軍扼漳平一路踴毀丁逆
賊卡三座高連陞截剿漳州踞逆大獲勝捷李侍賢棄馬而逃其
悍黨亡失殆盡見在汪逆勢窮圖與侍逆合股漳州南境地瀕大
海賊勢窘蹙難保不計圖入海左宗棠已飭提督劉清亮率所部
由同安徑趨石碼以保漳州東南一路令吳全美速雇紅單拖營
等船赴閩助剿以固海防所籌均極妥協著卽激勵各軍覘賊所
向會師夾擊該逆大敗之餘其膽已寒不難一鼓殄滅左宗棠當
督飭劉典高連陞等分路布置務須就地殲除毋任他竄汪逆李
逆逃往何處責令帶兵各將弁追截毋任合併一處郭松林一軍
當已到閩著派令嚴扼海口防其竄逸汀漳賊眾未盡剿除江西

廣東之防仍不可一日或懈沈葆楨尙未回籍著飭令派出各軍認真防範毋稍鬆勁廣東所派出境助剿之方耀等軍著瑞麟鄂嵩燕飭令會合閩軍痛殲餘逆潮州大埔一帶卽責成李福泰妥籌防剿以杜窺伺該逆既有入海之謀各海口均應一體防範並著瑞麟等飭地方文武員弁悉心籌防儻被闖入定惟該地方官是問決不寬貸將此由六百里各諭令知之○予福建陣亡副將哈必發殉難知縣陳疇等祭葬世職○予陝西殉難知縣繆樹本建祠○甲午諭禁山西種植罌粟○駱秉章奏蔡啟二逆屢次敗挫恃其城外各壘踞險憑堅以爲犄角臣嚴飭諸軍先將逆壘掃蕩卽可環逼階城以殲醜類正月初四日各營約會出隊總兵周達武破城東嚴家灣逆壘知府江忠淑參將劉鶴齡等破南岸山腰兩壘各營共斬賊八九百名該逆復於城北山腰添築新壘周

達武蕭慶高於初七日黎明分軍掩至立將新壘踏平殺賊二百餘名維時甘肅臬司林之望已帶隴軍一千餘名馳抵階境與周達武等面籌分布初八日該逆復於所破新壘之前添築一壘並以悍賊力禦我軍周達武等督隊進攻陣斬悍賊數十名賊眾大奔壘內之賊及築壘之賊相率而逃官軍已將東門之路截斷賊遂向城北奪路狂奔蔡啟二逆復於城上督隊以槍礮轟擊官軍冒險衝突賊復向城西敗走十一日蕭慶高周達武圍其墩上堅巢以斷糧道蔡逆力不能爭乃於北山之右急築一壘以遏官兵繞攻西門之路周達武蕭慶高於十二日出隊徑撲新壘斬賊數十名時城內所出援賊正與湘果右軍交鋒周達武蕭慶高復分軍截擊擒斬百餘名援賊大敗十三日遂將城北墩上堅壘攻破壘內悍賊二三百名悉被斬殺蕭慶高周達武黃鼎等以階城東

南北三面連拔賊壘層層進逼惟城西兩水一帶賊壘相拒較遠
必須移營橫截斷其內外接應之路十四日蕭慶高等分路並進
四面包鈔黃鼎陣斬蔡逆假子蔡四及僞先鋒張姓等生擒老賊
數十名殺斃百餘名武字營陣斬悍賊二百餘人各營俱有斬獲
賊乃敗潰入城兩水援賊亦被官軍擊敗壘內之賊自知勢不能
支意欲衝出十八日夜開江忠淑劉鶴齡督隊力攻遂將賊壘二
座攻拔餘賊由浮橋搶渡復經各軍截殺墮河者不計其數共計
斬斃者三百餘人蔡逆見城外各壘連被攻毀兩水各壘復被隔
斷遂將城北舊城山五壘之賊均撤入城復令僞巡捕蔡三蔡四
率領二千餘人由城內竄出救援兩水之賊其時黃鼎已將僞都
統周政幘等招降其餘各壘之賊併入城內分向西北狂奔周達
武劉鶴齡蕭慶高英毅營各分軍會同黃鼎連夜跟追於二十日

及賊於高家村距階城八十餘里適甘肅臬司林之望督飭兵圍扼隘堵禦賊見官軍追至拌死抵敵官軍奮力擊之該逆伏於村內乃於夜間翻山逃竄二十一日各軍復追八十餘里午刻及賊於蕭河壩官軍分路截殺斃賊數百名餘眾棄械乞降其蔡三蔡四均已帶傷率其餘黨向草川子一帶奔逃復被黃鼎林之望等截殺餘眾亦皆乞降此股竄匪二千餘人無一倖脫臣已批飭各營將收降之眾分別訊明如係被脅者卽行遣散儻係老賊卽予正法以絕後患二十二日周達武派隊掘坑引洩濠水城內出賊數百人來爭立被擊退奪獲器械多件見在蔡啟兩逆因踞孤城已同釜魚檻獸臣惟有嚴飭諸軍迅速圖攻以期擣穴擒渠埽除三省邊患報聞○予甘肅陣亡副將蕭慶友等祭葬世職○乙未諭議政王軍機大臣等丁曰健奏官軍剿滅全股踞逆並搜捕餘

匪妥辦善後一摺前據曾元福奏巨逆洪機竊斃全臺肅清當經諭令曾元福丁曰健督兵搜捕餘匪務絕根株見在洪璠又被擒獲匪黨洪熱古等均就殲戮是臺灣地方業已安定著曾元福丁曰健將善後一切事宜妥爲籌辦並將逃散零匪悉數搜擒以期除惡務盡永奠民生漳州賊氛雖挫尙未就殲深恐偷渡來臺勾結爲患著曾元福丁曰健懍遵前旨實力巡查妥籌防範毋稍疏虞左宗棠徐宗幹務當督飭將弁乘屢勝之威迅速攻復漳郡剿滅匪眾俾免日久蔓延將此由五百里諭知左宗棠徐宗幹並傳諭曾元福丁曰健知之○是月展級山東各商龍應完帶徵課款並山西臨汾縣咸豐十年民欠額賦